

[平行時空下的結局]後香港小男人 網上日記

作者: 如影隨風

Powered by [紙言](#)

Week33 Tue

Week33 Tue

經過琴晚餐飯之後令我諗咗好多嘢。

Janet無疑係一個所有男人都夢寐以求嘅女人，後生、靚女、有錢、如果佢冇講大話嘅仲係萬中無一嘅處女。相比起阿Kit，最大優勢就只係我嘅初戀情人，甚至我想同返佢一齊，都只係為咗當年個份唔甘心，當年原本屬於我，但又突然離我而去嘅.....肉體。

係呢個煩惱嘅時刻，當然唔少得一個專業嘅意見啦。

Eric聽完之後第一個反應：「你有冇再痴線啲呀，唔要唔好晒呀，益下兄弟啦。」

然後Eric嘗試用一大堆客觀嘅理由去說服我放棄阿Kit，當中嘅理由其實都不無道理.....其實我都不過想有人係理念上支持下我揀Janet嘅行動。但係我都係決定.....

「俾我考慮下先。」

「兄弟，睇黎你真係痴得好嚴重下，面對住Janet咁多客觀嘅完勝條件，你都仲要考慮，睇黎阿kit一係就真係好吸引，一係你俾人落左降。」

「不過做兄弟嘅，就係要睇住你明明行緊條死路都會推你去死，起碼你唔試過唔心息，但唔好話我唔提醒你，如果你選擇左阿Kit，你面對嘅壓力定係問題都會比俾人話你食軟飯嘅壓力嚟得更大。其實我心知面對條件咁完美嘅Janet你都要有所考慮，其實只係出於一個最原始嘅理由。不過愛可唔可以當飯食先？你離開左Janet，冇左呢份工，你仲有冇能力去照顧阿Kit兩母女呀？」

果然係好兄弟，面對住呢啲咁重大嘅人生決定入面，竟然一反常態，咁詳細（同長氣）咁去為我分析，其實佢所講嘅我都明，但我真係需要一啲時間去消化。但係我今晚真係好開心，自從阿Moon件事之後，我都冇再見過一個咁認真嘅佢，今晚佢竟然會為咗我呢個咁優柔寡斷嘅人而再流露出咁認真嘅自己。

兄弟呢家嘢，真係情義在心中啦。

Week33 Wed

Week33 Wed

經過咗琴晚Eric嘅一番肺腑之言（但俾我無視為廢話）之後，我腦入面嘅諗法好似變得更模糊，直覺上話我知，阿Kit係我一生中最大嘅遺憾，如果我再一次由得呢個遺憾流走，可能我會永遠後悔。同樣地，如果我由得Janet呢個絕種好女仔由我手中漏走，我可能亦會悔恨今日所做嘅決定。

就係咁，一整日我都有認真做過嘢，或者應該係話，我都有咩嘢要做。就係臨收工嘅一刻，我接到Janet嘅電話，佢約我今晚食飯，係我連yes or no都未有機會講個陣，佢已經收左線。Fine，反正同靚女食飯都有損失，當係俾個機會自己了解清楚想要咩都好。

係同一間餐廳入面，我嘅感覺比起初次見面個陣要presentation嘅時候更加緊張。眼前係一個過億企業嘅決策人，一個女神級嘅少女（處女），最重要嘅係佢竟然睇上咗我呢個死宅男。

當啲餸嚟齊個陣，佢除低左件外套，個刻我嘅思緒好似俾眼前嘅「美景」吸走晒，直到佢叫一叫我，先回到神。

「喂，你幹麻看這麼久啊？你看哪裡啊！」望住紅都面晒嘅Janet，真係好吸引。

「呃...唔好意思，平時好少見你著得咁...性感」大家可以想像到當時嘅我係幾咁尷尬。

Janet今晚响外套之下，只有一件非常鬆身嘅低胸幼吊帶長裙，基於男性都係唔會用腦思考嘅生物，所以呢一刻我只係諗到...唔知佢有冇帶bra呢？

相比起我嘅反應，Janet真係比我大方得多。佢笑咗一笑，紅住面咁講：「賓，只要你願意，我可以跟你分享所有的東西，包括我們的生活、工作、還有...只要你對我好，我願意.....你可以每天看個夠。」

天啊，試問一個咁完美嘅女仔係你面前，同你講一番幾乎係表白嘅說話，叫人點拒絕呀？

「對於你嘅心意，我全部都收到晒，但係.....」

「不過，你有在考慮另外一個女人，對吧？」

我點頭。對於Janet嘅心意我完全清楚晒，簡單啲講，我就係佢嘅全部，但我真係好想諗清楚，我怕我會揀錯。但係，我仍然好想知道點解世界上咁多好男人唔揀，偏偏會揀中我呢個一無事處嘅宅男。

可能出於自卑心作祟嘅關係，我問咗條到而家都覺得好白痴嘅問題：「以你嘅條件，就算要揀個比我好百倍嘅人都絕不成問題，點解...你會對我...」

「我不就對你說過了嗎？一直以來，追求我的人為數不少，不過他們都沒有令我放安心的理由。你要知道啊，當你有了錢以後，就會害怕別人都是衝著你的錢而來啊。但是你不同，你會把我當成你身邊的人，帶我進你的生活，跟我談自己的感受，在我做錯的時候更會罵我。你讓我感著到，其實我也能成為別人眼中的小女人。」

呢個世界真係唔到你唔信，一個少女強人，係生意上可以精明決斷，但竟然會因為有人同佢傾心事，甚至鬧佢而深深愛上個嗰人。經過今晚，大致上我已經好清楚了解到Janet對我嘅感情係去到一個咩嘅程度。食完飯，Janet車左我返屋企，雖然架車唔係屬於自己，但落車一刻始終會有種飄飄然嘅感覺。正當我返上樓嘅時候，Janet落左車，走上前輕輕咁錫左我嘴唇一下。之後佢講左樣令我好驚訝嘅事俾我聽：「想你剛剛看傻了眼的樣子，其實我也緊張的要命啊！總覺得太暴露...太難為情了啦！不過啊，Mnady替我選的時候說過啊，只要我穿上它，任何男生都會看到眼定，連你也不例外！看來Mandy說對了，哈哈！」

又係Mandy，佢到底想點？

Week33 Thu

Week33 Thu

琴晚餐飯睇怕都係Mandy精心部處，但係點解佢又要咁做呢？一方面係到勾引我，一方面又要幫個妹嚟追我。都算，就算佢知道Janet對我有意呢樣都唔係問題，問題係點解佢連阿Kit嘅存在都知？呢一刻，可以係我同Mnady之間存在連結點嘅除左Janet，仲有佢。

「Eric，你入一入我間房。」

「點呀，係咪又有咩煩惱要我幫你解決啊？今次Janet定Kit啊？」

「你有冇同其他人提過我同Janet同阿Kit嘅事？」少有地，我好認真咁問Eric。

「冇.....掛」見我突然咁認真，Eric都有少少淆，答句野都帶晒頭盔。

「你諗清楚啲？」

「Mandy囉，不過佢地兩姐妹，應該唔算其他人掛。」

「又唔見你會同我講下你平時床上表現，啲你就啲啦，仲可以同人閒話家常！」

「咁分散注意力，可以持久啲丫麻。」

對住呢個兄弟，真係唔知應該好嬲定好笑。

Week33 Fri

Week33 Fri

呢一日，我方返工，除左唔想俾一大堆煩惱影響到我嘅工作之外，主要原因都係我真係唔知返到去有咩要做。於是我選擇左做一樣好無聊嘅事，就係返上廣州視察下（Janet嘅）業務。不過主要原因，都係因為想見下小吉，點解？當然唔係因為我想飲酒，然後再飲到不醒人事，跟住再次發生嗰晚嘅事啦，我發誓，絕對唔係！其實想見佢，都係因為我講過，我當佢係朋友，咁有事想問朋友意見，好正常啫，何況，我真係好需要一個中立啲嘅人俾意見我，加上佢嘅經歷或者會令我有另一番領會。

係我方通知嘅情況下殺上office，當然成公司嘅人都好驚我嘅突擊觀察佢嘅工作表現啦。不過佢咁有佢咁扮忙，我一入到去就逕自走到小吉個位到，佢假都未請就俾我拉咗佢出去。我拉咗佢去一間酒吧，我發誓我當時真係冇諗歪，真係冇諗過會借醉行凶。我將我近期所發生嘅事一五一十咁同小吉講晒。點知小吉回咗一句好玄嘅嘢：「你嘅目標係咩？」

我而家就係唔知自己想點先山長水遠走嚟搵你俾意見，你又問返條咁嘅問題，我應該點答呀？

「唔知，買樓掛。」

「咁買樓你要啲咩？」

「咁仲洗問嘅，梗係要錢啦！」

「兩者間邊個係呢方面對你最有利？」

嘩頂，咁功利嘅諗法，睇嚟真係經歷返咁上下嘅悲劇先會講得出。

「但係，我唔想將愛情睇得咁功利，我而家係想搵一個愛我嘅人，而唔係包起我嘅人。」

「唔通Janet就唔愛你嗎？賓哥，我問你，記唔記得我曾經用我肉體交換你幫我落香港呢個條件？」小吉問得好直接，少少尷尬都有。

「記得...」你唔提我都實記得呀，其實我而家都仲有啲心郁架！當然我方講出口。

「當時嘅你並冇應承到，其實作為一個男人，面對住一個咁嘅誘惑都可以堅持住自己嘅原則，我就知道你真係一個好人。你而家嘅困惑係你知道無論揀咗邊個，都係傷害咗另一個係咪？而且到呢一刻你都冇辦法作出揀擇可能係因為你對兩個都有感覺。但係對Janet，你唔知自己因為佢嘅各項優點而對佢有好感定係出自真心；至於阿Kit，你好清楚知道你將來要面對住一個人每日都會提住你，我唔係你親生架，嘅感覺，但出於你對Kit嘅遺憾，你好想揀佢。」

的確，小吉完全講中晒我嘅困惑，不過答中都冇用架，而家又唔係小學常識問答比賽。係我沉思緊嘅時候，小吉繼續講：「如果Janet同阿Kit一齊困係火場入面，你會救邊個先？」

嘩，你唔好再老土啲。諗咗陣之後，我都係揀唔到，所以.....

「我會救火先。」係答完呢句，換黎嘅係被小吉白左我一下眼。

「係生死關頭你都唔知應該救邊個，即係你其實對兩個都係出自真心啦，如果係咁，我問你最後一樣嘢，愛情同麵包你會點揀？」

「.....」我無言以對。

「其實你係呢個遊戲入面，從來冇被規限出只可以揀一樣，點解兩樣嘢唔可以共存呢？客觀啲講句，Janet無論係愛情抑或麵包方面，都有絕對壓倒勝嘅優勢，你要知道，機會唔會咁好彩有第二次，尤其係一個咁完美嘅機會。」

「我諗我明你講咩嘅，我會消化下架啦。」其實我明，最簡單直接嘅意思，就係揀Janet。但係阿Kit點，如果我再一次離開佢，佢可能會一世都唔會再對男人有信心，唉，好煩，唔理住啦，好好享受下今晚啦！

呢一晚，我自隊咗好多，最後都係要小吉送我返酒店，之後.....乜都冇發生過，我就好似臨走前嘅一晚咁，攞住小吉，由佢好安心咁馴係我身邊。

Week33 Sat

Week33 Sat

今日同小吉食完早餐之後，我就落返香港，諗住拎個電話出黎睇下有邊個搵我。由於我上去嗰陣為咗唔想俾人搔擾，我熄咗機。點知睇返原來Janet同Kit都各有幾個未接來電同幾條wtapp，而我就好像一個犯咗錯嘅小朋友咁，唔敢去睇唔去面對。但要嚟嘅始終要嚟，喺我返到屋企嘅一刻已經接到Janet電話。

「賓，這兩天你去哪啊？怎麼又不上班，電話也關機啊？沒事吧？」電話另一端嘅Janet嘅聲音聽得出好緊張我。

「我上咗廣州探下班舊同事，咁廢事晒電咪熄咗機囉，我有事，放心。」

「待會有空嗎？我想去旺角。」

「啱啱返到落嚟香港，好叻，我想抖下，下次先啦。」

「那就約定你下星期一吧，可以嗎？」

你係我老闆，咁公然放我假俾我去巡視我自己嘅（動漫）業務，當然求之不得啦。

「你咁講係咪啱咩放我假呀？」

「當然！我還怕公司比較忙，你又罵我呢！那現在你可以就好，約定你嚟！」

我老闆怕公事上俾我鬧，真係世界第九大奇跡啫。不過睇得出，Janet真係將我睇得好重要，明明以佢身份，幾時約都有理由會怕我拒絕丫。係Janet收線冇幾耐，又到阿Kit嘅wtapp，係啫，就算我唔上，我連接咗網絡都會顯示兩個tick，即係已經成功發送到我手機啫，可能佢見到變左兩tick，知道我已經收到之前嘅信息啫（兩個tick只係代表收到，並唔係睇咗，希望佢唔會錯呢個concept啦）...死啦，唉，都係要睇佢講咩架。

「賓，今晚得唔得閒，不如出黎食飯。」

「賓，你係咪已經決定咗？」

「賓，你有事丫麻，打俾你幾次都有人聽，打去你公司又話你今日冇返工，冇事嘅回一回我，至少等我安心。」

「我知你收到我嘅信息，你係咪因為有咗決定所以唔再搵我？」

望住阿Kit嘅信息，我真係唔知應該點做，隔咗陣，Kit又上咗線，今次佢冇send任何嘢過嚟。我應唔應該再搵佢呢，搵佢又好似俾希望佢，唔搵又好似遺背咗我當日嘅承諾.....最後我都係搵咗佢，即使作為朋友，佢都擔心緊我嘅安危，於是我打咗俾佢。

「我呢兩日返咗上去廣州間公司處理嘅事呀，所以熄咗機，攞到你擔心好對唔住。」

「.....」我隱約聽到，電話另一邊傳黎Kit嘅啾泣聲。

「喂...喂，你冇事丫麻？」

Kit忽然破口大罵：「冇事？你知唔知你忽然失蹤，我幾驚幾擔心你呀？我驚你唔知係咪到頭來都接受唔到我有個女，我唔知你係唔係選擇逃避然後唔再搵我，又好擔心你唔知會發生咩事，點解你上去都唔可以話聲俾我知呀？」

今次到我語塞。

「對...對...對唔住，我唔知原來你會有咁多憂慮，對唔住.....」

「得啦，我唔想講住，我唔係好舒服，想抖下，拜拜。」就係我應都未應得切嘅時候，阿Kit已經收左線。到底我要點做先可以唔傷到任何一個嘅心呀。我真係好想大叫出嚟呀~~~~~

Week33 Sun

Week33 Sun

今日，我俾老豆嚇親。

老豆話我哋今日提早做冬，於是一如既往，老豆叫埋肥叔叔同瘦叔叔兩個一齊嚟食飯，老豆之前成日話，做冬張飯枱都坐唔晒人就唔「老利」，所以咁多年嚟都有叫埋兩個叔叔一齊食。不過，今年多咗個人，=12ptAunite Hui=12pt。

食成餐飯，兩位半百嘅前度，竟然好怕羞咁唔多出聲。而我哋三個人就一味細聲講，大聲笑。

老豆响我哋食晒嘢之後，終於開口：「各位，我有事向大家宣佈。」

我哋三個立即歡呼。

老豆話：「我哋兩個決定正式復合。」

係！只係復合，我哋等咗好耐，睇下有冇第二句，但係冇囉！

我忍唔住問：「唔係再婚咩？」

老豆話：「唔係。」

「老豆，你唔係諗住俾返個名份人咩？」

「傻仔，我哋兩個咩年紀呀？結婚報稅就話有著數啫！而家都退休啦，有鬼用咩！如果兩個人嘅感情只係靠一張紙先承認，咁就唔叫感情啦！」

呢個時候，瘦叔叔問咗一句：「咁你宣佈嚟做咩鬼嘢啫？」

老豆竟然答：「冇，見做節搵啲高興嘢講下啫！」

我哋俾老豆呢個咁無厘頭嘅答案攞到冇晒聲出。

Week34 Mon

Week34 Mon

今日約咗Janet去旺角，雖然之前都有落過去，但都集中咗係我嘅「業務」區到行，不過今日，Janet忽然興之所至，想欣賞下班街頭賣藝者。由於當時佢好專注咁睇緊表演，所以叫我餵佢食嘢，喺旁人眼中，我哋應該係一對熱戀中嘅情侶。

如是者，佢有佢睇表演，我就繼續欣賞佢嘅少女特有嘅天真容貌。我係到諗，我何德何能令一個女強人係我面前做返自己呢？正當諗到入晒神嘅時候，Janet叫一叫我。

「看甚麼那麼入神啊？人家面上有甚麼東西嗎？」講完之後仲特登拎咗塊鏡出黎照下塊面。

「我...嗯...冇呀...覺得你真係好單純好可愛，所以望多兩眼咋麻。」

Janet再一次面紅，佢怕羞嘅樣實在殺死人啦。

「我上次話，你考慮好了嗎？」

「我...俾多少少時間我...」

其實無論係阿Kit抑或係Janet都已經表達晒佢地對我嘅心意，而家差嘅只係我嘅決定。其實愈拖得耐，傷得大家愈深，但我應該點做？

係今日走之前，Janet叫我聽日都唔好返工住，要帶我去一個地方，雖然我唔知去邊，但都應承咗。

Week34 Tus

Week34 Tus

今日晏晝，Janet帶咗我上一層位於跑馬地嘅單位。我一行入屋，講真唔係話好大，應該最多得500呎左右。但係不過就裝修得相當有心思。落地玻璃嘅廁所間隔，加上開放式嘅廚房，本身睇落已經大好多，原本睡房嘅地方亦都同廳打通咗，用升高木地台取代原來房間間隔，真係品味十足。我唔知其他人點諗，但呢間我諗我就算打一世工都未必買得起，對我黎講呢間屋簡直就係一個夢。

見到我呆咗唔識反應，Janet首先打破靜局：「喜歡嗎，如果你願意，這房子就是你的。」

「點解.....」我幾乎係明知故問.....

「我只是要證明，我給你的，絕對比你在考慮的另外一個人多。」

「我係唔會要呢間屋。」我斬釘截鐵咁講。

「為甚麼？難道她真的有比我好嗎？」

「唔係，只係你當我係咩人呀？我鍾意一個人唔係為咗佢啲錢，只要我鍾意，就算我養佢都唔係問題！」係講完呢番咁假高尚嘅說話，我真係有少少後悔，因為我真係好鍾意好想要間屋呀。

「所以說，你選擇她了？」

「聽日，下晝三點，旺角等，我帶你去一個地方，到時我會俾答案你。」

就係咁，我地離開咗跑馬地，走個陣我同Janet講有野做，唔洗送我返屋企，佢都有再過問我要做咩就走開車走咗。

Week34 Wed

Week34 Wed

今日出門口前，我特別叮囑Janet著得casual啲，我怕佢以為我會帶佢去咩高級地方。我先叫佢揸車嚟接我，之後由我車佢去目的地，因為咁樣，感覺上會似係我主導啲。

係差唔多三點嘅時候，我哋到達咗----旺角。我帶Janet上左一間女僕cafe，入面空無一人，當然啦，我包咗場，雖然好貴，但為咗跟住落嚟嘅行動，絕對值得。

我先叫Janet坐低，然後我再入咗去廚房準備。半個鐘後，由一班女僕一齊將我個精心炮製嘅街頭蛋包飯拎出去，面頭用茄汁寫住「Janet我愛你」。之後我再拎住串魚蛋出去，冇錯，係魚蛋，並唔係花。我一路行一路望住Janet，佢嘅面上唔知幾時開始，多咗兩條淚痕，唔知係因為感動定係其他原因呢？

「阿賓你.....」Janet嘅聲音有啲震...

「傻瓜，唔好再喊啦，我而家咪係你身邊囉，我唔會俾你再傷心架啦。」我輕輕咁幫Janet擦走面上嘅眼淚。

點知我講完，Janet喊得仲犀利。

佢一路喊一路話：「其實你昨天說完你不會為了錢而跟我在—齊，我真得很害怕，我怕我的自以為是會令我永遠失去你。一直到剛才，你喊我等你—下，我還怕你是要把她帶出來，介紹是你的女朋友阿。」

有人話，當個女仔喊個陣，好簡單，只要攬住佢就可以令佢平服，點知.....我一攬住Janet佢就不停打我，一路打一路用廣東話講：「衰人衰人衰人！」

出奇地，Janet竟然冇鄉音。Janet望住一臉驚訝嘅我就話：「其實我都識講廣東話，不過我好怕羞，驚講錯野，你係Mandy以外，第二個聽我過我講嘅人。」

「乖啦，唔好再喊啦，快啲試下我為你親手整嘅街頭蛋包飯啦，入面有齊你平時鍾意食嘅嘢架。有臭豆腐啦，炸魷魚鬚，仲有芝士薯條架。」

「怎麼...好像怪怪的...」佢食咗一啖之後就俾咗個咁嘅反應，我都明白，味覺呢家嘢係好主觀嘅，所以我唔介意佢唔識欣賞呢碟我精心炮製嘅美食，於是我唯有自己食咗佢啦，不過我食咗一啖之後都係...「唔該，幫我倒咗佢。」我叫人倒咗碟蛋包飯絕對唔係因為好難食，只係因為呢到始終係人地鋪頭，我都係order返人哋嘅食物算啦。

係等嘅同時，我將我手上嘅個串魚蛋交到Janet手上。

「希望你唔好介意我手上嘅並唔係浪漫嘅玫瑰，因為呢咁先係原本嘅我，我最真實嘅生活。我願意帶你入我嘅生活，所以...雖然好怪，但希望由呢串魚蛋開始，可以帶俾你最真摯嘅幸福。」

「不會啊，我覺得還蠻浪漫的！」Janet再一次流下眼淚，不過我相信，今次佢所流嘅係幸福嘅眼淚。係跟住落嚟嘅兩粒鐘，都係同啲女僕玩下遊戲，個刻我哋真係好似一家人咁，好幸福好溫馨。之後

Janet因為呢兩日嘅情況太波動，需要調整下心情，加上頭先嘅眼淚令到佢隻眼都腫咗，所以我哋決定返屋企，今次由Janet渣車。其實我唔介意俾女人主導，因為我始終都係個小男人。

返到屋企樓下，Janet再一次落車走到我面前，唔同嘅係，我主動咁錫咗佢嘅額頭一下，Janet已經好滿足咁上返車。

Week34 Thu

Week34 Thu

係我選擇咗Janet之後，我知道我終有一日要同Kit講清楚。但係點開口呢？我知道無論點都好，我都唔可以再拖，我要講清楚，如果唔係Kit只會更傷。於是我打俾佢，諗住今晚約佢食飯順便同佢解釋。點知，我一打過去，竟然打唔通，仲要同上次Nancy嗰次一樣，已經停止服務。點解會咁？唔通我打錯，冇理由架，之後打咗幾次，結果都係一樣。

我真係好擔心，唔知佢會唔會發生咩事，所以打咗去佢公司到問，點知佢公司回覆話佢已經辭咗職，仲要自己補錢走。到底發生咗咩事，watsapp再見唔到最後上線時間，佢個部又唔係iphone，咁只有一個可能...佢封咗我。

我擔心到Janet約我出街我都用唔舒服為理由推咗佢。Eric見到我咁頹都忍唔住問我做咩事。

「你唔係攞掂咗你啲感情煩惱啦咩，仲頹咩？」

「我搵唔到阿Kit，佢職又辭咗，電話又cut咗，watsapp都封埋我，我完全搵唔到佢。」

「客觀嚟講，咁係一件好事丫，起碼佢自動退出。」

「佢點會無啦啦咁呀，佢又未知我揀咗Janet，我正想今晚同佢講。」

點知Eric突然好惡咁講：「屌你條死仆街，好心你放過人啦，人哋都自動退出咗，你仲咁大費周章去搵返佢出嚟有乜作為呀？想再hurt多佢一次呀？仲要話俾佢知你揀咗第二個？人哋或者想走得冇尊嚴啲啫，點解你係都要迫佢知道你最後點揀。佢都係人嚟，你有冇諗過可能佢唔想知呢？做兄弟嘅唔會話你有冇揀錯，但你而家仲走去關心人就大錯特錯！」

我識佢咁耐都未見過佢發咁大脾氣，我都不過想至少俾返個交代阿Kit啫，唔通咁都有錯？

Week34 Fri

Week34 Fri

琴晚我諗咗好多呢排所發生嘅事，諗點解Kit點解會粒聲唔出失左蹤，諗下我對Janet到底係唔係認真，仲諗咗一大堆假設性嘅問題，諗諗下，直到朝早先瞓著。我起身個陣已經係晏晝一點，我見到Janet send咗條wtapp嚟，約我今晚食飯，但我真係好煩，所以再一次推咗佢。

瞓到咁晏嘅我唔知有咩做，於是諗住落街行陣散下心。行咗個幾鐘之後，由於通街都係「強大的中國人」，又有衛生又有禮儀，攞到冇乜心機行。不過諗諗下，我女朋友Janet好似都算係大陸人啫...唉，不過點同呢，呢班低質素嘅人點同我嘅Janet比。我嘅Janet？係啫，而家我同咗佢一齊啦啫...我仲諗住第二個，好似都幾對佢唔住...

平時返屋企之前，我都會留意下個信箱，因為我老豆從來唔會拎信。今日如常咁睇有冇信個陣，我見到一封冇貼郵票嘅信，所以好肯定係有人親手放入去嘅。封信仲寫明俾我，呢一刻令我聯想到阿Kit。

返到屋企我急不及待咁打開封信。

「寶，當你見到呢封信個陣，你唔洗再搵我，因為我已經離開咗香港，我知道冇咗我，你可以活得更好。你一定好奇怪，點解我會不辭而別。你記唔記得你由廣州返嚟個晚，我哋嘈過嚟？我冷靜咗幾日，呢幾日你都冇搵過我，我好驚你會係呢次之後都唔再搵我。於是係今日我走去你屋企樓下等你，我好想親口同你講對唔住，好想話俾你知我都不過係因為太害怕失去你。等咗好耐都未見你出現，正當我想打俾你個陣，我見到你係架私家車到走出黎，隔離仲係一個樣貌比我後生，比我更靚嘅女仔。初初我都不以為然，直到我見到佢走上前，而你亦都主動錫佢之後，我已經知道咩事。

寶，其實你冇錯，但係我知道我真係冇辦法再以朋友身份去見你，所以請你原諒我嘅離開，你真係唔好再嘗試去搵我，就當留返半點尊嚴俾我，等我可以走得瀟灑啲。或者有一日我可以再一次以朋友身份出現係你面前，或者到時，大家可以好似見返一個舊朋友咁，只有喜悅，再無傷感。我同你今世注定有緣無份，個天俾我再一次遇返你，當時我都唔敢妄想可以同你再續前緣。但你之後對我嘅追求，我真係好開心，同時亦都好擔心，因為我好驚，好驚你知道我原來有個女之後，你會離開。你係一個好男人，絕對有資格作出更好嘅選擇，而我都不過係一個失婚嘅女人。雖然最後你真係選擇咗第二個，不過對你嚟講，呢個先係一個明確嘅決定。你係第一個令我心動嘅男仔，亦都只有你到今日仍然令我感動，如果可以，我希望下一世陪伴你身邊嘅人係我，不過唔知我會唔會有咁嘅福氣呢。如果你睇呢封信嘅時候，有一點嘅傷心，甚至內疚，咁你應承我一樣野，就係無論我哋將來點都好，你同佢都要過得幸福快樂，如果唔係我會嬲你一世架。

阿Kit」

睇到呢到，我喊咗出嚟，好大聲咁喊出嚟，望住呢封阿Kit對我最後嘅溫柔，腦海不斷浮現出我同佢一直以嚟嘅片段。我嘅初戀，一段曾經刻骨銘心嘅愛情，一個曾經最重要嘅人，我不知不覺間竟然對佢造成呢一個咁大嘅傷害，而且連最後一刻，佢都以我幸福為前題，我真係好內疚，好心痛...阿Kit，我地雖然有機會一齊走到白頭，但你永遠都會係我心入面，佔一個好重要嘅位置，用個心好好咁珍惜。

愛若難以放進手裡，何不將這雙手放進心裡...

Week34 Sat

Week34 Sat

琴晚我睇完Kit封信之後，我send咗條watsapp俾Janet，約咗佢今晚食飯，點知佢有個會要開，於是改咗做聽晚。由於我唔想自己一個留係屋企亂諗嘢，所以決定返工，用工作麻醉自己。一返到去，Eric就入嚟搵我。

「點呀，肯返工啦咩，即係你諗通晒啦？」

「算係掛...」我將Kit封信嘅大致上嘅內容同聽晚約Janet食飯諗住講分手嘅事話晒俾Eric知，亦同時對自己嘅行為作咗個總結，我真係一個仆街。

「既然阿Kit都講到咁，就咪話做兄弟嘅唔點醒你。如果你真係諗住同Janet分手，你就係真真正正嘅一條人渣。」

「我唔想拖住佢，佢係一個好女仔，佢絕對可以揀個更好嘅男人。」

「收皮啦，學咩人扮偉大，你而家同佢分手純粹係為左想彌補對阿Kit嘅錯，但咁做有用咩？佢人都走咗，加上講到明真心想你幸福，你估佢想見到你為咗佢而去破壞自己嘅幸福咩？咩唔想拖住人，講到尾跟本就係你自卑，你適唔適合佢，Janet係當事人佢會唔知？人地咁多人唔揀都剩係揀你，你仲講嘢乜？問心，你唔愛Janet？如果你覺得傷害Janet，一個你都愛嘅人，只係為咗彌補你對阿Kit所造成嘅傷害，咁唔該你死咗佢算，你憑咩傷完一個又一個。如果唔想內疚而去傷害人，咁你跟本最唔應該留係呢個世上。」講完之後場面落入一片靜局。

今次我終於肯先開聲：「咁我而家應該點做？」點解我一問口就問埋啲咁白痴嘅問題架...

「如果你真係愛Janet嘅，咁你就應該去捉緊你嘅幸福，唔好俾佢再有機會走；如果你真係唔愛嘅話，你好好咁講清楚，長痛不如短痛。其實你對佢係點，我相信你個心已經有答案，所以，我只係一句，永遠心嘅諗法最緊要，唔好太在意所有外在因素。」講完Eric就行咗出房。

由收工到返屋企，我一直係咁問自己，我到底愛唔愛Janet？有幾愛？點解愛？甚至咩係愛？原來我做咗咁多年，連咩叫愛都未攞得清就已經做咗咁多次，興幸嘅係，我身邊總會有人幫我解答。

不知不覺諗到老豆返嚟，佢好識做咁冇問起我琴晚發生咩事。

反而係我問咗佢一條問題：「你愛唔愛呀媽呀？」

「梗係愛啦，唔係點會一齊咁多年，到而家都仲會成日去同佢傾計呀。」老豆答得好快，好理所當然，諗都唔洗諗一樣。

「咁Aunite Hui呢？」係我問完之後，老豆沉默咗好耐。

「愛，不過我哋亦都因為好多原因所以分開過，到今日我哋係返埋一齊，其實都算係一種緣份。」

係我未答得切嘅時候老豆繼續講：「其實你一齊過嘅人或多或少你都會對佢動過真心，話冇嘅就呢人

嘅，問題係呢個世界有幾多人結婚對象係最愛個嗰？最緊要嘅係珍惜眼前個嗰。老土啲講句，如果有一日你發覺，你人生嘅路上面，可能會突然缺少咗某一樣你覺得好重要嘅嘢，無論如何，流過眼淚之後，你都要繼續行，比以前行得更快，行得更大步，總有一日，你會同佢再見面，一定會！」聽完之後，我第一個反應係笑咗出嚟，老豆你呢排睇得男人唔可以窮太多啦，啲咁老土嘅對白都背得出。不過我諗我今次真係明你想講咩。

我知道個天冥冥中自有安排，如果我注定要同阿Kit一齊，咁無論點我同佢到最後都會走埋一齊。同樣地，如果注定我同Janet要分開，無論我做唔做啲咩，我哋都係會分開，所以我決定，順其自然啦！

Week34 Sun

Week34 Sun

今日同Janet食晚飯前，我帶咗佢返我間中學參觀。點解？因為我想一五一十咁話俾佢知，我同阿Kit嘅過去，亦都令佢清楚佢曾經嘅對手係個咩人。起碼，佢仲有權選擇應唔應該繼續同我一齊。之後，我地再一齊去咗山頂餐廳，坐返同一個位。

Janet一坐低就搶咗個發言權：「謝謝你阿賓，謝謝你這麼誠實的告訴我，你和她的過去，這樣更令我願意繼續跟你在一齊，我對你有信心，因為我對自己更有信心！我知道我沒有選錯人，我相信我們能夠牽手到白頭。」

「多謝你對我嘅信任，希望我哋將來可以對大家永遠都咁坦白，Janet我愛你。」

呢一晚，雖然充斥住甜蜜嘅空氣，但我心底知道，阿Kit我會永遠掛住你。

The End

Janet自白

我的故事，該從哪裡開始講好呢？

這樣說吧，愛情這回事，我曾在小說漫畫中讀過，在流行曲中聽過，在電影中看過，卻沒有真正經歷過。在言情小說的薰陶下，我幻想過，期待自己的愛情也是來得激情、過得浪漫。

在慢慢長大以為，我開始了解到人其實很恐怖，男生沒有書中的主角那麼痴心，那麼純真。從高中開始，我都不缺乏追求者，可是當中有人喜歡我的臉蛋；有人喜歡我家的錢；有人喜歡我的身材。我常常在想，如果有一天，這些外在條件都剝落以後，他們還會喜歡我嗎？

就因為這樣，一直以來我都沒有喜歡上任何男生，念書時全副精神都投放在書本上，工作時又全副精神放在賺錢上。直到有一天，我遇上了他。

他是一個平凡不過的男生，在世界上隨便都會碰上好幾個。我跟他的相遇就是因為Uncle Li，他向我推薦了這個人為我們公司做廣告。

就在第一次見面，我原本想先要了解他一下，到底有沒有資格負責我公司的project，可是沒想到，就在這頓飯，令我的心泛起了漣漪。他這個人不像其他男生般滿口甜言蜜語，他不會以投我所好，反而一直在聊一些我很久都沒有接觸過的動漫。他令我認識到，另外一個世界，一個好像很有趣的世界。

原本我以為我跟他應該只是朋友，最盡也只是朋友。但是愛情這東西往往是很奇妙，就在我生日那一天，它悄悄的走進我的心。當天看著他穿整齊的西裝就知道他以為是要跟我談生意，不過他卻說是為了要見我。原本我對這些甜言沒多大好感，不過由他說出來，不知為甚麼好像蠻真實的。其實啊，你願意陪著我去玩，都是因為我是你客人對吧，我知道的，不過我還是要感謝你陪著我過這難忘的生日。

那天晚上，海風很維港兩岸的夜景陪伴之下，他拿著只有手掌大小的蛋糕為它點上蠟燭，用他那跟環境完全不相襯的低沉聲線唱生日歌，我覺得真得好幸福。我感動到眼淚快要掉下來。

從那天以後，每天晚上對他的魂牽夢縈，都不知多少次令我從夢中醒來，連幾千萬的買賣都沒有皺過一下眉的我，卻被愛情這東西弄得心亂如麻。

當他調上廣州的時候，我常常約他吃晚飯，但不知道為什麼，我跟他好像整天都只能夠徘徊在朋友關係之間。

面對這種事，我又不好意思跟Mandy談，不過後來Mandy也看得出端倪。她跟我說啊，好男生這東西，是要自己爭取的，他們通常都很內向，所以在萬聖節的那個晚，我把我的初吻獻給了他，我第一個真正喜歡上的男生。

我要說一下喔，其實啊，我一次戀愛都沒有談過，那次說謊都是因為被他那奇異的目光嚇到胡亂說出來的。

回家之後，那嘴唇的餘溫久久不散，以後幾天，我就好像個傻的一樣，經常不經然的笑出來。然後我還請Mandy教我說廣東話，因為我真的好想融入他的世界。我一直都很努力去學，為的就是來有一

天給他驚喜。

卻沒想到，後來Mandy竟然給我看他跟別的女生在一齊的照片，當時我不但很生氣很心痛，還哭了出來，我長這麼大還第一次為了一個男生掉眼淚。連後來跟他說，我有信心，可以給他更好的offer，也只是裝出來的堅強。沒想到他竟然拒絕了，我很害怕，我很怕他以為我想要用錢來買他的人，我怕他不會再想要理我。終於他說了第二天給我答案，這害我一整晚都失眠喇。

第二天他帶了我上去旺角的一家好像是餐廳的女僕Café，他叫我等他一下的時候，我真的很擔心他會帶著那個女生出來，還當成是女朋友介紹給我認識。一直想一直想，直到幾個人端著一碟蛋包飯，上面寫著「Janet我愛你」，我的眼淚就已經忍不住流下來。一直以來我都害怕會失去的人，今天選擇了我，還說不會再讓我掉眼淚。被他擁抱著的一刻，我真的很開心，為了報答他這「驚喜」，我說了幾句苦練已久的廣東話，看著他一臉驚訝，我就莫名的笑了。晚上在他家的樓下，他主動親吻我的時候，我真正感覺到，愛情終於來到我身邊了。

不過後來連續兩天約他，他都推掉我，又令我開始擔心了，不管是他真的生病了，還是他後來發現原來真的沒那麼喜歡我，決定要離開我。但我又沒辦法去找答案，只好一個人躲在家，憂心害我哭了整整兩天。終於，他約了我星期天食飯，但是我還是未能確認他是要提出分手，還是因為想我，我很怕很怕。記得看過一本小說，裡面有句話：「我的緊張，我的執著，只因為害怕再次的錯過，再次的失去。」

那天，他帶了我到他以前的中學，跟我訴說他和阿Kit的故事，雖然是說想向我坦白，讓我選擇要不要繼續跟他在一齊，但是我感覺到，其實阿Kit在他心中，佔了一個比我更重要的位置，沒關係，我知道總有一天，我能令他全心全意的愛我.....

筆者案：其實無論幾強悍嘅人，不論男女，面對住自己愛嘅人，都會變得疑心重，軟弱，會有好多無謂嘅假設，變得好煩，好幼稚，好唔講道理，其實一切一切都係因為太愛一個人。正如呀賓文中嘅最後一句，「希望以後我哋都可以對對方坦白」，不過到最後佢哋可能都做唔到，Janet疑惑阿Kit係阿賓心中嘅位置；阿賓隱藏對阿Kit嘅感情.....而呢啲被隱藏嘅秘密，可能成為每對情侶決裂嘅導火線。善意嘅謊言唔怕講，最怕自視過高，以為自己嘅大話可以呃得過所有人。

外傳----阿Kit篇

外傳----Kitty篇

記得當年，校園戀愛仍然未可以順理成章嘅年代，當時嘅追求者中最令我心動嘅就係阿賓。成績上佢稱唔上突出，外貌又唔出眾，點解會鍾意佢？或者因為佢嘅單純，佢嘅傻氣，又或者因為單純嘅鍾意。

記得當時嘅後樓梯，就係個到，我接受咗佢嘅表白。但係一個高材生戀上一個成績平平嘅男仔，當然會遭到身邊嘅長輩反對，由於父母極力嘅阻止，但我又唔願意妥協，最後我就被佢地送咗去外國讀書。

起初我都會諗，我相信我同阿賓可以經歷時間嘅考驗，我相信我哋最後一定會走返埋一齊。但係時間耐咗，到大學畢業，我開始諗，佢到底有冇記住我呢？佢會唔會已經忘記咗我...或者，從來只係我一廂情願咁以為佢會等我。所以我即使返到香港，我都打消咗搵佢嘅念頭。最後我接受咗另一個男人嘅追求.....個嗰人就係我前夫。

當時我諗住我可以為咗呢個男人放棄阿賓，所以我都盡量唔再諗佢。一年後我同呢個男人結咗婚，我以為從此可以同老公好幸福咁生活落去。點知好景不常，我前夫被公司調咗返上大陸公幹，由於只係幾個月，所以我都不以為然，仲好放心佢一個月返落嚟一次，因為當時嘅我對佢係100%有信心。不過原來男人真係信唔過，佢最後俾我發現佢係上面有第二個女人，我好嬲，我好絕望，我對佢嘅信任竟然換嚟一個咁嘅結局。個陣嘅我曾經諗過去死，但就係呢個時候，我發現我竟然有咗，而唔知點解我唔忍心落咗佢，就係因為咁，我迫住要自己堅強，我唔可以死，不過從此之後，我對所有男人都失去信心，直到遇返阿賓。

我同佢嘅再一次相遇就係佢做嘢間廣告公司到，十幾年冇見，佢嘅外表雖然變得成熟咗，但從佢身上所散發出嚟嘅單純，依然仲係到。個晚傾完公事，我約咗佢食飯，我好想知道佢咁多年嚟嘅經歷，仲有...我好掛住佢...

係呢一餐飯入面，我發現原來佢仲未結婚，個刻嘅我真係有種莫名嘅興奮，甚至幻想唔知有冇可能再續前緣呢？但一諗起，我只不過係一個失婚嘅女人，仲要有個女，邊有男人真心肯照顧一個日日都提住自己唔係佢親生嘅人架...

呢餐飯之後無耐，佢又約咗我出嚟食飯，我好開心佢主動約我。點知出到嚟，佢竟然係問關於佢同其他女人嘅問題，我當時就好似坐完過山車一樣，頓時係天堂跌返落地獄。不過都係一件好事嚟嘅，起碼知道，佢呢十幾年嚟冇單方面等我，至少唔會令我咁內疚...

係呢段日子，我同佢都會定期約出嚟食飯，我哋可以無所不談，我就好似佢嘅軍師咁，或者可以話，好似一對舊朋友...唔通我同佢永遠都只可以行到呢步？過咗一排，佢之前提起嘅Suki，同返佢嘅前男友一齊，仲要係由阿賓自己親手將佢哋拉返埋一齊。聽到個陣我雖然表現得好冷靜，但其實我內心好興奮，我係到幻想我同佢終於都有機會。係跟住落嚟嘅幾個月，我同阿賓一直都徘徊係朋友嘅關係之間，都係得閒出黎食下飯咁。

有一日，公司叫我過日本跟個project，要去兩個星期，咁岩阿賓約我食飯，我就諗住個日同佢講呢件事，話聲佢知等佢唔洗擔心點解兩個星期都搵唔到我。點知個晚佢話要ot，叫我等，約7點最後攞到9點先出現，唔止，身邊仲要有個一睇就知未發育完成嘅細路女，佢唔係dry到要搵援交呀？後來

佢介紹話係個廣告model，我梗係至少拎返個主導權啦，點知個小妹妹反擊一句「aunite拜拜」，我當然全程黑面啦。點知阿賓仲未知死，行行下仲覆wtaapp，仲要覆個個「model」，所以我決定飯都唔食，直接走咗，去日本件事就梗係唔講，當係懲罰下佢都好。不過我為咗話佢知，我仲記得當年我哋嘅事，特登寄咗粒石俾佢，希望佢都記得啦.....

就係我由日本返嚟嘅時候，我見到佢接我機，個刻真係由個心到甜出嚟，不過因為我仲要返公司，唯有同同事走先。第二日我就收到佢約我食飯嘅信息，其實我個心既緊張，又期待，唔知會唔會有啲咩特別事發生。

食飯個日，佢帶咗我返舊校附近，係咁講起以前嘅事，其實我已經感覺到佢之後想講咩，奈何我真係唔敢接受佢，因為我怕我會拖累佢。而到佢真係表白嘅時候，我真係百感交集，一方面好開心，好感動呢份愛跨越咗十幾年，今日再返嚟我手上，一方面我好後悔，好矛盾，我後悔當日讀完書返香港點解唔即時搵返佢，我好想自私咁同佢一齊，但又唔想因為個女而成為佢嘅負累。最後，我為咗佢可以得到更好嘅將來，我雖有忍痛放手，叫佢唔好再追我。

之後，我有收過阿賓嘅信息，希望可以做返朋友？賓啊，你唔好以為我真係咁蠢，我當然知道你咁做不過係想以退為進，你覺得只要一日係我身邊一日都仲有機會，不過件事唔係你諗得咁簡單，我有個女架，但你要我點開口同你講呀...過左幾日我再收到一條來自阿賓嘅信息，內容大致上都係想我信佢可以令我再次對男人有信心。不過阿賓，又點會知道，一直以嚟，我從來都冇對你失去過信心，今次，我只係對自己有信心.....

就係被瘋傳為世界末日前嘅一晚，阿賓約咗我出嚟，都係講返同一番說話，而我唔知係咪都俾末日預言所動搖，抑或我真係對阿賓咁有信心？我唔知，我只知，個晚我決定將我嘅下半生再次交到其他人手上.....至少係佢發現我有個女之前，我的確係咁諗。但係呢個事實，始終都要俾佢知，而當佢發現個陣，從佢嘅反應我知道佢接受唔到，所以我叫咗佢走。我知道，我唔可以咁自私，要佢接受一個唔係佢親生嘅女。

過咗幾日，我見阿賓都冇再搵我，我知道佢可能已經決定咗，但可能我犯賤，始終好想親口聽到個答案，於是我發咗個wtaapp俾佢，不過一直都顯示為一個tick即係佢未收到啦，可能電話冇電啫，我安慰住自己。幾個鐘後，我再發多個，但都係得一個tick，而因為我見到佢嘅最後上線時間仲顯示緊，但冇更新過，所以我知佢冇封到我。但係我開始擔心，佢會唔會發生咗咩事，不過我只可以擔心，乜都做唔到，唯有再發多個信息俾佢.....

呢一晚，我朦朦朧朧咁發咗幾個夢，發發下又醒，瞓返又再發過。夢入面，阿賓就係我屋企門外，我一打開門，佢就將我抱得好緊，緊到生怕一鬆手我就會離佢而去咁。

「嘻嘻，你終於嚟搵我地嚟？」我真係好開心，佢肯揀我。

但係夢始終係夢，夢境冇帶到現實，我醒嘅時候，見到之前發俾阿賓嘅wtaapp已經變晒兩個tick，不過佢依然未回我。就係我新嘅信息送出無幾耐，佢打嚟同我講因為公事上咗去大陸，我聽住佢講嘢，忍唔到流淚。阿賓啊，你明唔明我唔係怪你要返上去做嘢，而係點解你唔可以話聲俾我知，你知唔知我會好擔心你架.....

係同佢嘈完之後嘅呢幾日，我一直等佢打俾我道歉，點知等極都等唔到，我開始係到諗，其實我憑咩要佢對我交代，我又憑咩發佢脾氣.....我好驚佢因為呢次之後唔再搵我，於是，我決定親自去佢樓下等佢，同佢道歉.....我等咗好耐，當我想打俾佢嘅時候，我見到佢係部私家車到走出嚟，隔離仲係一個好冇氣質嘅妙齡少女，比起我，跟本已經超好多「班」。起初我都以為係普通同事，點知，我見到

阿賓主動咁錫咗佢一下，個刻我清楚知道，原來所謂嘅承諾，都不過係動聽嘅謊言。

阿賓，我有怪你，要怪只好怪當初我返嚟都有搵你，要怪就怪當初父母嘅反對，要怪就怪...「緣份」。個天俾我哋再一次相遇，再一次令我哋相愛，偏偏又要我哋開花不能結果，其實一切都冇得怨。你係世上難得嘅好男人，而我只係一個失婚嘅女人，我唔可以自私咁要求你揀我。不過，我真係有一個好自私嘅願望，如果真係有來生，我真係好希望可以陪你走過下半生嘅人...係我...

多謝你，阿賓，多謝曾經對我咁用心，多謝你對我嘅愛...

祝你永遠幸福.....

阿賓，我愛你.....

擦光所有火柴難令氣氛像從前閃耀，至少感激當日陪著我開甜蜜的玩笑.....